

四庫全書

集部

欽定四庫全書

集部  
覆瓿集卷二

詳校官太僕寺少卿臣李廷欽

中書臣劉源溥覆勘

總校官原任中允臣王燕緒

校對官中書臣孫球

謄錄監生臣張永浙

欽定四庫全書

集部六

覆瓿集目錄

別集類五明

卷一

五言古詩

七言古詩

卷二

五言律詩

七言律詩

卷三

七言律詩

五言絕句

六言絕句

七言絕句

卷四

序

卷五

記

卷六

記

說

銘

跋

卷七

賦

書啟

傳

墓誌銘

祭文

卷八

附錄

臣等謹按履齋集七卷明朱同撰同字大同  
休寧人洪武中翰林學士升之子也承其家

學自號紫陽山樵明史附見升傳中所紀官履甚畧范櫟跋稱洪武中以人材舉為東宮官尋進禮部侍郎而同時范準作雲溪歸隱圖跋則云由吏部員外郎陞禮部侍郎準字平仲嘗受業于升與同交至契所記宜得其寔又明史載同坐事死不詳其由蔣一葵堯山堂外紀乃云同以詞翰受知宮人多乞書便面一日御溝有浮尸帝疑之遂賜死其說

頗荒唐未可信也集凡詩三卷多元末之作  
爽朗有格文四卷議論純粹不愧儒者之言  
惟以七言古體之八句者列為律詩則編者  
之悞耳乾隆四十三年五月恭校上

總纂官臣紀昀臣陸錫熊臣孫士毅

總校官臣陸費墀



覆瓿集原序

嘗讀吾鄉汪公仁峯文集內有新安師友序專述理學諸儒稱許簡嚴而楓林學士之後繼以禮侍朱先生同大同先生字也學士之胄也是父是子家學相承即宦業亦自表表後以遭誣蒙難未竟厥施而懿行遺編則揭日月而行者矣涑以訪古仰止鄉先達曾跋涉至其仁里瞻謁先生遺像會其裔孫時新茂才問有無文集知久失咨嗟者久之逾月茂才搜錄先生覆瓿稿詩文

各數卷余斂容讀之文則羽翼六經詩則盛唐風致猶  
可想見國初渾渾噩噩之景象焉又何其幸也雖篇章散  
落十不存二三而得窺一斑亦可測其全體矣溯洙泗  
而嗣徽音是在箕裘與私淑之君子後學范涑書

欽定四庫全書

覆瓿集卷一

明 朱同 撰

五言古詩

伯元宅閱故書有感示彥珍

丙午

鄉里昔承平甲第爭相高十年罹兵燹瓦礫生蓬蒿君  
家全盛時池館集羣豪揮灑共談笑綠衣照青袍借問  
創業難昔人無廼勞動勞未易道勗君永終保架上多  
羣書片紙俱可攷徼倖不可求青霄未易到有源斯有

委母為彼行潦好風自東來悠揚吹百草及此愛日遲  
莫負青春早與君為兒童簡編時卷舒迴頭二十年舊  
學日已疎韶光速流電那能少躊躇君子與小人所趨  
不相如遠之良不難慎勿迷厥初作詩示同志因之重  
歎歎

始生日有感

癸卯

天馬辭月窟飄然來沙場飛鴻失其羣哀吟獨南翔我  
生胡不辰三年羈錢塘矯首屢四望雪晴關山長男兒

生墜地勲名在四方那能守丘園鬱鬱懷故鄉所悲有  
雙親白髮垂高堂溫清誰當共甘旨誰當嘗所以終夜  
起愴然悲以傷由來忠孝節千古垂綱常大罪既逆天  
細事胡足量登高觀大荒大荒何茫茫白日懸蒼穹不  
照游子腸

送吳允堅掌儀入閩省親

癸卯

海鳥拂羽翩翩然獨南翔楚人不識鳳馬能知商羊我  
本黃山人仗劍游錢塘見君恨已晚盤桓與蘇杭忽動

定省念告言駕海航我親亦念我白髮垂高堂未遂終  
養心中宵不能忘豈無負郭田與君濯滄浪男兒百年  
間事業不可量努力在少年莫令鬢毛霜我有清樽酒  
為君舉一觴酒酣發長歌中心愴以傷莫辭今夕歡可  
以訴衷腸明朝片帆去雲海蒼茫茫

樓居翫月偶成

戊申七月

岑樓乃面西不知觀月出但怪牕外山皺文何歷歷倚  
欄夜向分疲極暫偃息夢破五更寒滿樓映虛白呼童

急開牖當簷挂圓璧清氣灑襟懷皎月侵床席半輪漸  
銜山須臾盡傾沒遙天空明際四山已如墨佳景不可  
留難得良易失長笛忽一聲喚起東方白

贈副使丘克明 并序

徽府織染局副使丘克明居官時有毀之於上  
官者折挫抑鬱成疾不復出因得辭歸袁州與  
之友者哀詩贈行為賦此

木落長空高霜風凋百草此時新安客夜夢宜春道經

綸方欲展歸計一何早豈無五色線黼黻袞龍好所悲  
本素絲彰施非我抱自從居官來衣裳屢顛倒萋斐成  
貝錦危機固難保况以羸病軀當此百憂擣故山松菊  
晚三徑復誰掃歸耕實吾事巖穴聊養浩不聞堯舜世  
巢由亦高蹈勗君青松心永保冰霜操

同余子韶等十人赴儒選舟行分韻賦詩得臨

字 辛亥秋

明月出東海餘輝照衣襟赫日苦炎蒸愛此清夜深况



有羣賢俱樽酒相與斟共嗟會面難扣舷發長吟嚴親  
既我棄遺書寧披尋游子復遠征何以慰母心聖朝無  
棄物四海同君臨豈以衰絰儒而強加冠簪君當登雲  
衢我當歸故林努力崇令德矯首領佳音

彥銘江兄分韻得九字復賡之

里閨本非遙如何別來久今日獲同舟相看憶南畝聖  
朝起山林內顧何所有仰事猶未終固辭非敢後文昌  
富文藻雲夢吞八九覩此琳琅篇豈同草木朽

題蒲石軒

青青水中蒲磊磊澗邊石託根相依倚出處同所適託  
根各有宜出處亦有時昔也俱棄捐瓦礫沉污池今登  
君子堂璠璣等竒翫灌以清冷泉藉之青玉案蒲根朝  
潤石石罅朝雲陰嘉名揭華扁允矣君子心

贈馬則賢并序

馬則賢星源叔敬先生子也叔敬儒而能醫與  
先子友善則賢受府帖辟為吏不得辭尋以母

憂獲終喪之請而歸其鄉人江孟思訓導為哀

詩以贈因賦此

壬子

芳草碧未終秋霜一何早母恩那可思寸心欲奚報雖  
有白日輝已缺春暉好飲恨抱案牘方寸怒如擣陳情  
已得請几筵躬灑掃恧淚不敢揮嚴親亦云老志養已  
自慚况乃傷懷抱我親亦念我棄捐兩秋草去年被斬  
衰遠涉金陵道慈親日倚門眼枯鬢如皓聖恩果天寬  
放還喜絕倒雖無三釜養菽水毛蘋藻與君本通家世

學所當攷亡者既如斯生者期終保文昌哀詩篇令我  
索枯槁我辭亦良苦未易衆人告但願各勉旃矯首望  
穹昊

俞恕道掾郎入閩贈別

時王駙馬辟之

壬子

君子務行道仕隱非二途胡為斯世人視如冰炭殊醉  
心軒冕場如有桎梏拘放志丘壑間自謂巢由徒俞君  
通濟才况乃世業儒端居豈傲世宦游豈榮軀駙馬王  
晉卿好賢當代無閩徼開大藩一夫寧向隅君方居幕

下贊畫多良圖俊彥集一時青紫咸拖紆進取寧我心  
慨然思尊鱸歸來且慰意山水亦足娛知己終未酬明  
當戒僕夫秋風動征旆朋從餞城郭三山邈天涯興至  
成斯須賤子亦感恩未能効馳驅送君千里行屏營當  
路衢

瑞蓮詩贈李子才 并序

李子才宰昌化於凋瘵荒蕪之餘撫字深至民  
多歸之昌化舊有東坡池植紅蓮子才採蓮實

種居後是年即放花變青色明年花盛開中有  
並頭者子才喜其瑞自賦詩賡者盈卷歲壬子  
冬來江守徽郡癸丑夏會于郡齋以瑞蓮實及

詩卷示余索賦勉為步韻

癸丑

昔年李青蓮嘉號何芳郁所以聞孫池嬌紅變水玉方  
當移種時蓮房綻新綠善政猶蒲盧發達果神速舊染  
出污泥亭亭起初浴荒郊昔寥寥里烟今簇簇趨事若  
子來那復令額感瑞氣集奇葩雙鸞並肩宿豈唯感淳

風政爾勵澆俗既清貴溪流復濬練江曲勲名在朝堂  
暫此淹驥足誰當獻斯歌預擬汗青錄

題姚智伯仲凝霏軒

遂邑人

甲寅

濛濛烟霧姿靄靄山嵐影氤氳太虛伊誰為收領高  
人構層軒歛此微茫景霏集琴書潤氣侵衣裳冷花霧  
融春雲林氣掩秋鏡已識軒中人欲寫軒中勝琳琅詩  
滿編撫卷發深省

題杜休寧溪行圖

溪行足佳興草樹烟中稠天光蕩林莽石稜見長洲憶  
昔越中行逸趣甘林丘豈謂靖節翁亦有彭澤游府帖  
日夜下催徵無時休邦本既已寧民瘼誰當求感此發  
長吟擊楫臨中流何當獻斯圖一解蒼生憂

江孟思求題季弟歛教諭季用輓章卷

維南有祥鳳文采華羽翰好音鳴朝陽來集紫陽泮方  
當瑞盛時一往不復返空有五色雛羣從已星散世路  
多險艱勞生足奔竄蓋棺事即終何用計修短元方哀



獨深淚向詩篇滿  
淚枯眼亦枯  
當以情自澣

題自畫贈王德中

月出城東頭  
團團上明鏡  
古樹倚朱樓  
樓烏驚未定  
小星淡已無  
大星遠相映  
草露發夜光  
荷盤拭秋淨  
良朋喜同游  
清賞寄高詠  
安得白玉繩  
為人繫清影

七言古詩

春歸曲

丙午

春欲歸庭前  
小園花亂飛  
杜鵑聲聲口  
流血喚春喚  
落

空山月小橋流水柳絲斜水面游魚吹柳花春風蕩漾  
人自醉草深池暖生蒲芽亂紅堆溼君莫掃明年花開  
春又好但得有酒登高樓不用花前嘆春老四山雨過  
翠光流春歸不知蜂蝶愁野花爭開已結子如何不令  
人白頭

雪中書懷歌和范平仲韻奉寄黃陳二親

庚戌

幾年不見臘前雪今復三日迷長空六出微茫眇毫髮  
墮地化作冰瓏鬆大鈞播物本無意妙巧如此豈人工

赫日三伏間鑠石金為融宇宙炎炎淨無滓那有許物  
留蒼穹徹夜春蠶聲寒重頑無風曉視漫漫玉滿界琪  
樹冰柱交玲瓏已喜萬古煩歎盡併作一色乾坤同山  
禽苦寒下庭除此豈有意投樊籠燮理當聖明三白知  
年豐黃竹蒼梧事已往鄭田周鼎何時窮置此勿復陳  
憂心易忡忡故山早梅凍未開誰肯乘興探芳叢黃陳  
齊名世稀有祇共清樽擁爐紅我欲策蹇驢路危梁不  
通凭欄作詩寄遠目賡酬細味毋匆匆

黃親和前韻見示因再用韻奉寄

立春後二日

君不見少陵愁坐方書空亂髮過耳徒峯鬆蒼天欲留  
千載名故為起僵令詩工又不見天山六月雪未融平  
砂莽莽連蒼宮漢家大將不顧身直使絕域覘皇風失  
意騎驢京華春得志金轡搖玲瓏大夫升沉類如此古  
今一致誰能同天馬振霜蹄乾坤猶樊籠莫以萬里姿俯  
戀春草豐黃州風景豈要觀秦嶺高詠真途窮昔賢俱  
同黃屋憂寧為一已心冲冲用之夜驚鵝鴨池不用曉

訪梅花叢歲寒始知松栢堅肯逐浪蕪浮花紅臘凍成  
春泥泉動土脉通元氣已復行周旋與君靜守毋匆匆

雪後喜晴三用韻奉寄黃陳二親一笑

畫屏樓前高插空遠樹如髮冰瓏鬆羲和駕龍海上來  
淨掃豐隆藏雨工平地瓊瑤一尺強斯湏已作春泥融  
乃知幻物徒為耳變化神速由蒼穹高岡尚嚴凝萬里  
鳴天風玉削芙蓉射初日金碧焜耀光玲瓏此時十二  
欄清興誰能同初平鞭羊起白石仙骨肯受羈樊籠亦

有耽睡人翫易知旋豐二仙俱為方內游妙悟元化知  
通窮根歸迺枝萌夫豈心中沖沖我欲乘風三山行更向  
逋仙探寒叢人間富貴寧幾何使我不得童顏紅柯山  
太華只目前澗水原與滄溟通賡酬不盡登臨興却笑  
信筆徒匆匆

耕田歌

和王建體

丙午

林藏宿雨鳩聲急老農扶犁荷蓑笠田多不知牛力疲  
驅牛叱叱嗔牛遲野鳥隨人啄鯁鱗銜飛鳴噪桑樹巔

耕罷平田水如鏡涵空倒浸茅茨影白鷺雙飛不怕人  
香雪無塵羽毛淨野老田間自相語秧少傳聞好禾黍  
辛勤不敢望贏餘輸向官家奉明主

醉歌行贈唐佐衡

甲辰

君醉烏程酒我挽烏號弓飲酒非儀狄挽弓非逢蒙君  
不見陶令一醉北窓下陶然直與羲皇同又不見鼎湖  
龍去不復返獨留遺跡千古存蒼穹神物會有時不用悲  
途窮飲酒須飲二千石坐令四海還淳風挽弓向天九

鳥落但見一輪正日當天紅嘆君猶未遇  
躡蹬吳越中擊筑西湖上眼前四海空  
丈夫但保千金軀不患不遇真英雄  
嗚呼不患不遇真英雄

題鄭以仁府掾南山堂

癸丑

谷口鄭子真雖非陶處士彭澤歸去來未必不同志  
古人論心不論跡今人論跡不論心曾子武城子思衛  
出處一致非升沉築堂悠然對平巘碧雲過雨南山遠  
孰謂今人非古人淋漓文字見題扁



看雲生黃山採藥歌

江景榮

丁巳

看雲生黃山採藥行黃山之峯三十六採藥行行遍山  
谷有時看雲宿天都千澗萬壑雲模糊北辰咫尺星匝  
地當空皎皎秋蟾孤天鷄初鳴海光赤下窺羣動喧號  
呼白雲掀浪接滄海洶湧萬里迎金烏此時看白雲便  
欲扶輪登天衢沛然三日霖一洗旱魃羣生甦靈芝與  
丹草下以醫疲瘵上以寧君軀慶雲布祥癡瘴息天札  
俱令歸壽域看雲不負出岫心解將醫人轉醫國功成

依舊歸黃山採藥看雲老山間石牀夜濕洞雲宿芝草  
曉茁東風還紫陽山人昧精討看雲不識黃山道安得  
乘此秋風早與子相期拾瑤草

送吳彥才之京

己未

吳郎休陽人每念休陽樂一朝挾策辭休陽回首白雲  
滿山郭紅日曷曷升天衢五色雲中朝帝居男兒有才  
當大用何必儒生空讀書

程節婦

玉可裂劍可折貞婦之心不可奪山可摧陵可隳貞婦  
之操不可移荃蘭松柏有至性肯與百卉同衰盛唐虞  
三代嘗比屋共姜以來能幾姓程家遺事得所聞保幼  
植弱心尤勤慈孫孝子不忍說詠歌尚托垂後人

送黃彥輝之官長洲丞

朝發京都城暮上姑蘇道姑蘇臺上今何如搖曳春風  
有芳草芳草萋萋接長洲居民商舸何其稠大船如屋  
連平地清歌妙舞盈高樓此地民風尚華藻力農不似

為商好商兒鼓柁任所游貧民科徵豈終保理民平政  
在斯行慎勿速效藍田生

激清軒歌為呂旭作

壬戌

左史裔孫東籬子築室先塋俯清泚登車攬轡懷昔人  
高揭軒名照牕几憶昔趙宋自南渡國計每被姦臣誤  
忠臣烈士何代無裂眚衝冠向誰訴賊臣專制無敢言  
左史秦檄盈書編讜言直論破鬼膽父子輝映相後先  
桑田久矣淪滄海賊子奸臣復誰在大義長行天地間

白日懸空耿光彩聞孫傳家有真跡寶愛不啻連城璧  
每言傳跡不傳心祖孫何曾異今昔當年邂逅游芹宮  
樽酒幾度良宵同長夜挑燈誦遺藁義氣凜凜橫心胃  
攜書自我來京國兩年不見澄清色夜深回首黃山雲  
風露滿空秋月白

率溪汪茂卿求寫溪山小隱圖因題圖左

漸江天際來如絲委蛇下遶孫王祠兩岸青山如走馬  
勢與江水俱馳下疎烟遠近見村墟茅屋竹籬總堪畫

隱士家居溪上村雲烟水石供晨昏田園歲入了官賦  
足跡不到王侯門谿魚入市充盤餐啄黍有雞牢有豚  
論文痛飲醉方已高明滿座無空樽秋風蕭蕭歲云暮  
奔走誰能免公務乾坤如許憾身多何況持家立門戶  
寫畫題詩良獨苦夢魂想像無由覩我欲作詩奉明主  
挽此高風還淳古四海蒼生悉安堵

送儒醫洪毅夫

松蘿山頭雲氣橫落石渡口滄江平舟人艤棹童子候

欲別未別難為情  
洪君不獨醫國手  
千金秘傳懸肘後  
蘇家有井不自醫  
投劑二豎聞風走  
江樓有酒君莫斟  
酒斟不盡離人心  
杏花成林春風深  
花屏山下來相尋

散步至楓林

信步尋春不知遠  
小徑委蛇遶平巖  
雨餘翠滑石磴危  
青梅如豆低垂枝  
屋上青山壓簷重  
風裏幽禽時一弄  
主人不歸柴門關  
山犬認人自迎送  
花落鳥啼白日閒  
依稀機杼鳴林間  
徘徊不覺歸來晚  
淡黃落日啣空山

古木寒林歌

甲寅

遂邑蔣存中以名家子選為稅務官得請而歸  
求余寫古木寒林賦此題之

遂陽山城萬家邑古木參天蔽原隰虎踞老石龍迴空  
雷擘蒼崖起羣蟄故人結茅溪上居日臨流水觀扶疎  
因懷萬牛棟梁重乘輿偶謁承明廬滄海無際百川趨  
挂席欲進空躊躇故山喬木邈何許但見萬里連荒墟  
秋風江山客衾薄夢到家山舊丘壑青林白日誰共閒



遠望有人高倚閣解印翩然歸故丘再覩古榦交螭虬  
棟梁無用甘檇散與爾老壽同千秋紫陽山人筆如舌  
為爾寫向鷺溪雪堂上今亦生楓樹安得長歌繼前哲

萬松道人吹簫圖

甲寅

萬松道人者三衢之開化人也宗李氏學有塵  
外致好吹簫其鄉人汪彥脩與余會於遂邑彥  
脩讀儒書頗能曉葬法自號拙閒老人道人因  
彥脩求作萬松道人吹簫圖值連日苦雨不能

出因為寫以遣日併題數語以貽之

萬松道人持洞簫吹作鈞天鳴鳳韶海月初上萬松頂  
清影滿地風瀟瀟吹罷玉宇空寥寥餘音縹緲隨風飄  
青鳥前導豐隆御乘輿便欲凌青霄玄丹已熟九鼎火  
白鶴不畏長天遙萬靈執役雷電走倒酌北斗翻招搖  
拙間老人眼如電每向燈前究黃卷清癯已是地行仙  
識君知心豈知面求我為寫萬松圖手弄叅差自相娛  
吮毫欲寫輟復止豈以色相摹太虛我亦吹簫翫月窟

金丹未能換毛骨  
賀老誠能識謫仙  
大鵬九萬同超忽

覆瓿集卷一

欽定四庫全書

覆瓿集卷二

明 朱同 撰

五言律詩

感懷 癸卯二首

報國空懷策，思鄉懶上樓。  
家山千里遠，湖海二年秋。  
世態須青眼，羈棲自白頭。  
倚門思子淚，應寄浙江流。

其二

不作東山卧，空登王粲樓。  
丹心朝對日，病骨夜驚秋。  
故

里頻來夢吳霜易上頭憾如江水濶薄暮接天流

送人歸後有懷

歲月懷桑梓霜風到客衾思親方寸亂送客淚痕深此  
去望鄉信何時聞好音神光應變化寶劍暮龍吟

次韻馮伯昂同發姑蘇

魯酒不可飲須傾三百盃君恩猶未報丹寸肯成灰自  
有鯢鵬路可令鷗鷺猜長江波萬里誰負濟川才

次韻伯昂見寄

家山不可望南國暗旌旗怕讀登樓賦長吟伐木詩雲  
低江樹遠天濶海帆遲却憶同舟夜何如載雪時

可惜

可惜碧桃樹孤根遠日華綠微枝底葉紅淡雨餘花傍  
水含朝露照人生晚霞明朝重去看一一墮泥沙

題畫

密樹深藏寺輕舟暖棹烟藤蘿垂石上草閣俯江邊高  
岸立峭壁歸鴻來遠天平生江海志付與畫詩傳

端午中黃親招飲齊明樓分韻得榴字

五月春花樹牆頭有火榴情因親故重酒為倡酬留山  
色入牕滿溪聲繞座流何須問蓬島只此是丹丘

舟過石崇湖次韻彥銘

辛亥

山勢西來盡波平接太清地連天塹重名蓋石崇輕鏡  
淨空無滓風翻浪忽驚掀篷莫回首何限故鄉情

其二

舟行堤漸濶圓影浸空清浪蕩四山動帆飛一葉輕望



遠心如醉思親夢亦驚君恩天廣大那可不陳情

贈王若霖二首 并序

王若霖歙之儒生也素未之識回自鍾山適值  
同行時若霖新授江南奉新丞至新嶺之北曰  
馮村將別自為起句求余足之以贈別因再用  
韻以勉之云 辛亥

且酌樽中酒重逢未有期歙南看月夜江右望雲時路  
逐溪聲轉山隨行處移明朝登嶺後回首倍相思

其二

幼學壯行志書生本自期方當勤苦日莫負聖明時  
雨過嵐光重雲開樹影移祇應崇令德千里慰遐思

題折枝梨花兼實圖

癸丑

秋日梨花詠道園曾有詩青枝已秋實白雪尚春姿  
蘇子非今夢杜陵憶少時不因良友筆誰重昔賢思

題自畫扇贈曹子純

野樹秋容老層巒曉氣蒸寺鐘如隱隱江水自澄澄  
舉

世悲傷足何人樂曲肱抱琴林下者好結浴沂朋

贈智惠憶歸南泉

欲破愚癡障須懸智惠幢三生漫吳越一吸盡西江泉  
石曾供眼雲山故入牕祖燈期再續已見外魔降

七言律詩

內附七  
古佚篇

西村畫山水為羅傳道邑令題

辛丑

飛泉千尺垂長虹嵐氣散作烟空濛秋林高下見村屋  
古寺如聽雲間鐘樓臺依約烟樹表溪橋野艇行人小

西村盡癖嗟余同對此興與秋天香

次韻馮伯昂見寄

君在高樓對山坐我向蓬牕對山卧湖山收雨作晚晴  
山色滿簾牕外過茶烟石鼎松風遠半枕梨雲春夢破  
起來便作春山游莫待早梅如豆大

其二

錢塘江頭看潮坐錢塘江上聽潮卧潮聲半夜捲海來  
一霎雷霆枕邊過起來倚劍看青天月光出海半輪破

笑問醯鷄窺裏天豈知世上乾坤大

上巳苦雨呈汪養晦

戊申

三月三日苦淫雨春游無計令人愁  
雲低暮色近垂地  
風捲濤聲遙撼樓  
青天白日果何處  
急電轟雷方未休  
最憐桃李花開樹  
零落離披不自由

大雨

三月十八苦炎蒸  
客子解衣如甑中  
忽驚雷電繞庭戶  
已見風雲盈大空  
雨聲倒挽銀漢落  
水勢直與滄溟同

前村咫尺斷來往令人倍憶濟川功

夢中渡江之作

東風如顛怒清曉百尺危檣挿天表張帆破浪追流星  
萬頃茫然一時了半生慣見風濤險登岸汗流愧沙鳥  
回看烟際波連空青山一點江南小

登子陵釣臺有感

清曉扁舟維岸陰百年幾渡來登臨游人仰扳石磴險  
飛臺俯瞰滄波深客星帝座一時事江水雲山千古心

哲人去矣不可見  
擊劍空作秋龍吟

題畫

老虬參天勢欲動  
古樹錯立交隆從  
清溪雨過生碧雲  
隔岸嵐光入簷重  
小亭臨水清且漣  
怪石翠濕苔蘚妍  
倚欄讀書兩忘言  
豈應未了黃庭篇

汧口程伯齡扁所居曰容膝山房求余寫喬松

古木圖因題以為贈

己未

老松參天倚清瀆  
卓立迥出凡木羣  
百年生息飽雨露

一日變化超風雲雲溪故家足喬木容膝山房更清淑  
知君每愛林下風故寫幽人坐溪腹

應制作瀟湘八景

甲子三月

洞庭秋月

岳陽樓前秋風起碧波夜涼秋在水纖雲捲盡四望遙  
一色澄清幾千里爛爛銀盤海上來金光蕩漾鏡中開  
洞簫依微碧烟外應有羽客凌風迴

瀟湘夜雨



三湘重湖碧雲暮岸葦江蘆不知數孤蓬夜半驚夢迴  
四顧茫茫莽回互乍疎乍密還瀟瀟澤被枯槁翻天飄  
江湖豈無廟堂念恩深不知千里遙

煙寺晚鐘

重巖疊障生虛籟碧烟隱寺橫如帶老禪出定月照廊  
數聲忽度長林外西來大慧非頑空要將耳觀開愚蒙  
洪音浩蕩無遠邇播揚萬里資皇風

江天暮雪

嚴風凜冽雲垂地遠岫平林失蒼翠馮夷剪水作飛花  
一色迷漫滿天際孤舟釣緝昏未收蓑衣清興勝狐裘  
三白但有豐年兆一身饑寒何足憂

平沙落鴈

秋色澄空碧霄遠  
收氣肅寒雲捲  
數聲嘹唳天外來  
低落平沙水清淺  
羽毛獨爾知隨陽  
豈為饑腸懷稻梁  
銜蘆不煩避矰繳  
解網今已同商湯

遠浦歸帆

灑氣滿空秋灑灑  
潦盡潭清木葉下  
片帆幾點天際來  
破浪乘風如走馬  
江漢今為鴈鷺池  
商舶釣艇從所之  
暮歸晨出會有時  
慎勿縱欲令人嗤

漁村夕照

茅屋人家小門逕  
紅蓼白蘋欲齊脛  
收緝曬網插疎籬  
短渚長洲遞相映  
紅輪留照懸遠空  
水村澤國俱春融  
飯飽不知身外事  
歎乃一曲歌淳風

山市晴嵐

平湖遠接青山麓  
瓦屋布帘烟簇簇  
瞳瞳海日出山頭  
晝靄林霏淡平陸  
鮮鱗可買醪可沽  
醉歸不倩傍人扶  
皇風萬里被海隅  
漁樵樂土無處無

山居述懷

壬寅

投跡窮山休便休  
閒身猶抱古今愁  
百年自分田園樂  
萬里誰思社稷憂  
郭令豈無陶令志  
董生寧有賈生籌  
經綸本是男兒事  
莫理雕蟲到白頭

奉寄陳秉初

欲寫蕩蕩報所知  
楚天雲濶鴈書遲  
扶傾已藉諸公力  
側席應勞聖主思  
舊俗難忘周社稷  
危時空望漢旌旗  
投鞭何日踰天塹  
晉拜元龍會有期

夢歸梅花初月樓

一劍新從死地來  
夢魂長繞故山隈  
清輝萬里秋光老  
寒影幾枝春信回  
但覺親恩天廣大  
豈知世事日塵埃  
片時枕上團圞樂  
無奈城頭盡角催

過永樂田家有感

移舟暫泊釣魚磯一逕委蛇入翠微落日園林鷄犬富  
秋風平野稻梁肥農翁但道征徭重啼鳥那知世事非  
莫怨棲遲身是客家山亦有舊柴扉

嚴君誕日

年年稱壽梅花月今日淒涼思故扉堂上有親垂白髮  
階前無我戲斑衣淞江秋老人空瘦回嶺風高鴈過稀  
安得元戎先十乘洗天風雨早同歸

七月登吳山感去年離家之作

癸卯

江上秋風吹客衣江頭塞鴈又南飛報君寸鐵曾無補  
作客一年猶未歸黃菊未沾新雨露白雲應鎖舊柴扉  
登樓莫憶去年事且向欄杆看落暉

雨中奉寄李仲吉員外戴子華二契兄

興來欲訪戴安道詩好長懷李謫仙客裏風光渾是夢  
雨中官舍小於船已知生死同今日莫使才名愧古賢  
世上英雄誰是主與君努力中興年

奉寄山陰縣丞陳大用

才名本自重南金未許相逢歎陸沉異路共為千里客  
故鄉誰念五更心海門日上天光近江浦雲歸樹色深  
莫道過門風致盡扁舟正擬過山陰

同年仲望叅謀高德初過嘉興三塔寺分韻賦

詩得門字

風急舟輕似馬奔楚吟又動望鄉魂暮雲三塔林間寺  
茅屋幾家湖上村鴈陣遠衝霜浦冷邊塵遙接戍樓昏  
平生每愛逢僧話帶月何妨叩梵門



宿嘉興通濟院題壁

過盡平湖擬問津，忽驚林屋傍湖濱。  
竹陰風細疑無暑，花落鶯啼別有春。  
身世不逃嗔妄想，飄零長作別離人。  
何時一了平生願，歸去家山拜老親。

至日登吳山

聞道春從地底還，望春獨上吳山巔。  
海帆幾點落天外，塞鴈一聲來日邊。  
彈缺敢求遷代舍，思尊未許賦歸田。  
男兒出處關風化，不用擡頭問老天。

次韻高德初述懷

時寓化成卷

夢破梅花夜不眠，滿牀明月正中天。  
一時用舍真兒戲，千古興亡著簡編。  
身老自堪歸杜曲，詩成誰使效張顛。  
平生心事何人解，擬向王門一上箋。

其二

笛聲驚起海龍眠，送作江南雨滿天。  
世上風雲閒老手，山中燈火廢殘編。  
竄身嶺海悲韓愈，借榻禪房喜大顛。  
自是草廬無意卧，不煩束帛為箋箋。

奉贈唐佐衡老師

平生每愧朱公愜，歲晚忽逢唐子西。  
上國未瞻郊鳳至，故居空聽夜烏啼。  
談詩抵掌唾壺缺，把酒臨風江月低。  
他日卜隣何處好，黃山高與白雲齊。

次韻楊思齊感懷

百鍊冰清任斷魂，吹竽無意上王門。  
三年未有匡時策，一飯總成明主恩。  
獻賦得金真易與，草玄投閣不堪論。  
頭顱鏡裏今如許，莫遣秋霜鬢上存。

同馮伯昂泛舟由姑蘇過吳江抵錢塘舟中有

作

連牀夜聽姑蘇雨  
柔櫓曉棹吳江雲  
大地北來山勢盡  
長江東去浪花分  
知君久抱屠龍技  
歎我空懷封禪文  
安得扁舟早歸去  
故山高卧謝知聞

吳江即景分韻得池字

平湖萬頃去帆遲  
遙見孤村列戍旗  
一塔已無當日箭  
三高猶有昔年祠  
風掀急浪飛橋動  
霜滿高樓畫角悲

欲訪鴟夷何處是望中烟樹自參差

過吳江思歸

甲辰

歲暮江春憶故園片雲猶隔路三千長歌作客豈今日  
拔劍出門思去年古歎春歸梅似雪吳江風靜水如天  
雙親欲望兒歸日無奈南來有障烟

次韻馮伯昂見贈

扁舟載雨夜沉沉好語時聞咳唾音彈鋏作歌知客憾  
論功坐樹見臣心無緣可結三生夢有志終成百鍊金

江左幾時休戰伐與君携手步園林

元日有感

壬寅

萬國衣冠拜袞衣  
兩年元旦負歸期  
江雲朝捲千尋碧  
海日晴曛五色旗  
江上雪消春水長  
山中寒重早梅遲  
莫思鄉黨常年會  
寶劍當酬國士知

慈親花甲之日是夜夢中稱壽覺後有感

壬寅

夢中樽酒壽慈親  
夢覺登樓望白雲  
四海尚聞悲戰伐  
百年何計樹功勳  
眼枯自灑孟宗淚  
情裂誰憐李密文

但得寰區歸上國，便當萬死報明君。

次韻萬壽塔長老贈天真藏主天真宣人

萬壽寺前古木森，繫舟時復遠相尋。  
詩成不作人間語，琴好誰聽世外音。  
琪樹風生驚夜雨，法壇雲靜覆春陰。  
敬亭山色何年別，日暮江東千里心。

題冷起敬如此江山亭

亭構吳山百尺梯，更闌時聽海鷄啼。  
絲桐夜雨清猿夢，楊柳春風送馬蹄。  
雪漲海門天塹濶，潮回江浦月痕低。

登臨若問登臨句如此江山如此題

發錢塘至餘杭城阻雨三日題城北樓二首

三載江淮奔戰塵濟時空負百年身青山尚是來時路  
城郭今非舊日人追信已無蕭相國舉賢誰似晉胥臣  
明朝又上新安道回首錢塘淚滿巾

其二

百雉孤城流水東青山掩映戍旗紅蛙聲日夜亂城柝  
嵐氣作雲漫碧空茅屋幾家兵火後關河千里戰塵中



鷓鴣自有天池路非復吳中舊阿蒙

過昌化次前韻

未拂征衣滿面塵雲林何計乞閒身  
荒村白日有啼鳥廢屋頽垣無住人  
大地豈應終破碎普天誰為正君臣  
高堂自有二親在且向晨昏事盥巾

度昱關宿老竹田家及抵家述懷

甲辰

險阻艱難備此程百年生死一毛輕  
但知憾比徐方寸深媿才非杜北征  
茅屋晝藏牛共卧山溪夜渡虎同行

歸來已喜雙親健莫遣秋霜上鬢莖

次韻李仲吉見贈

千里還鄉已到鄉故人應是更淒涼  
珠還合浦神光在鴈叫寒雲別憾長  
滄海桑田心不變山林鐘鼎事何妨  
雪深山逕藥苗小何日林間遇阮郎

奉簡敬道兄長見顧

林間終日坐蒼苔有客過從此地來  
厚醜遠稱慈母壽好懷今為故人開  
黃昏燭盡雲山出半夜詩成風雨催

莫厭田家供奉薄，看花村塢當銜盃。

題自作山水

小閣獨坐日無事，幾迴飛夢到天台。一時風雨眼前過，  
萬里山河筆底開。林下有人閒白晝，世間無地不黃埃。  
便當辦取九節杖，劍閣匡廬頻往迴。

其二

誰剪吳江半幅天，滄洲詩思便悠然。長江萬里雲垂地，  
錫杖一條僧上船。怪石定從山上落，喬松勢與海相連。

好山是處堪圖畫任取旁人笑米顛

過瑤溪訪俞敬道不遇因留宿是時敬道有金

陵經商之行

故人別去忽三月乘興泠然御曉風避客本非段干木  
泛舟應擬陶朱公牕間月影生林外壁上燈花落酒中  
自是過門不相見風流難與昔人同

贈別鮑尚綱赴人才選

五月炎天金石流故人何事買行舟興亡莫問烏衣巷

嘯咏應過白鷺洲  
幾載焚膏傳世學  
一朝束帶應時求  
欲知別後相思處  
月上梅梢夜夜樓

施杜端三使君見訪索贈

聯翩三騎出城東  
此日追游清賞同  
但向梅花翫初月  
肯隨柳絮逐春風  
稻收平野郊原曠  
鴈叫清霜宇宙空  
先後錦還京闕近  
莫言耕釣有隆中

秋雨感懷

雲鎖千巖晝不開  
攬衣小閣獨徘徊  
風飄翠色紛紛下

雨送寒聲陣陣來，竹葉已空前日醉。  
桂花莫受曉霜催，眼中千古興亡事。  
撥向爐中鐵筋灰。

實夫有金陵之行，令人重增慨嘆。短章奉寄以

見下懷。

春首過從到敝廬，談詩清夜剪園蔬。  
久知衡宇能容膝，豈料王門再曳裾。  
見志但知孫綽賦，濟時莫上賈生書。  
眼中故舊飄零盡，回首西風歎索居。

汪尚書輓章

澤民

敬亭秋色何人敵，天挺竒才出士林。  
問學始膺先代澤，艱危終見老臣心。  
乾坤推轉有興廢，賢聖操持無古今。  
德業已垂青史筆，却令後死重哀吟。

歸故宅

曲曲清溪來往頻，故園又得見先春。  
筭穿舍北竹繞屋，梅倚牆頭花笑人。  
泉石幾家供客眼，江山萬里暗兵塵。  
由來軒冕多翻覆，澗水松風未是貧。

同鮑氏諸公游靈山絕頂松林

大地山河一覽中登臨感慨古今同片雲又作人間雨  
萬里自來天外風尚有塵埃盈下界全無纖芥礙虛空  
吹簫玉女雲中下指點蓬萊滄海東

冬夜

千林秋盡夜迢迢十二欄杆倚碧霄道統已慚周茂叔  
將門還許霍嫖姚亂山明月涼如雪半夜狂風怒似潮  
白面書生成底事莫將身世老漁樵

題白雲樓



自作陶高人已仙白雲明在尚悠然登樓作賦傷今日  
倚鍾攜壺思昔年欄倚長空秋見鴈林藏積雨夜啼鶻  
九齡帝與誇當日白髮重看繼世賢

題登源綠照亭

登源洞裏石如屋綠照亭前水作湖溪聲遶坐驚風雨  
山色入欄供畫圖身世幾時歸澗谷林泉何地不蓬壺  
高朋盡日追游樂莫厭沾衣雨載途

贈項子全

三衢項子全宦遊江湖間常勤勞王事已而以  
醫學自娛乙巳歲携其子訪宗族於貴溪過門  
求見索詩適以他出不及奉迓走此為謝

過門未識子全面久矣逢人說項斯宦志已灰更變後  
宗枝還念未分時曾楊近古無神術盧扁于今有國醫  
尚擬好風吹杖履夜深雨足剪園葵

山中書懷奉寄葉實夫

丁未

投跡深林百念休春花秋月與追游雨餘山色朝當戶

風外溪聲夜滿樓已拚歸畊辭虎口還思結友效龍頭  
吟餘獨上南岡望猶自空懷杞國憂

五月十五夜對月

丁未

正愁苦雨作梅霖向晚雲開見遠岑天淨已推圓鏡上  
山高猶隔半村陰清光本自無圓缺人世果誰分古今  
明夜陰晴不可斷欄杆獨倚漫沉吟

同董伯和登砂子嶺觀聖潭瀑布

丁未

小徑穿溪斷復通叢林陰翳失西東重巖直入九霄上

古廟深臨萬壑中  
白日忽驚飛急雪  
青潭慎勿怒潛龍  
誰知一勺靈秋水  
解與人間作歲豐

上江山中即事

山上青山樓上樓  
結樓高下倚林立  
通幽一徑苔蘚滑  
壓屋四山空翠流  
松梢滴露作疎雨  
嵐氣入簷生早秋  
我來暫下陳蕃榻  
一洗平生今古愁

至楓林登東山樓有感

樓隱喬林白日長  
桂花不斷四時香  
山蒸嵐氣作朝雨

竹引水風生晚涼身在豈應愁計拙興來時復動詩狂  
東山一為蒼生出羸得人間話幾場

曹操楊修翫曹娥碑圖

戊申

江水粼粼照岸浮古碑如堠立江頭誰知手撫吟髭日  
已是心疑國士秋奸計不逃人物議畫圖解寫古今愁  
沽才鬪虜固應爾更有同時鸚鵡洲

嚴陵舟還喜晴贈陳大用

幾日濃陰撼朔風今朝新霽早推蓬山頭積雪連雲白

海上明霞照水紅  
身世已知歸計穩  
舟行況與古人同  
通家喜有朱陳舊  
努力躬耕待歲豐

其二

霜寒水落石如林  
瀉壁直下三千尋  
溯流豈辭上灘澁  
到家不厭尋源深  
片片浮雲或聚散  
袞袞長江無古今  
此懷只有陳搏解  
故喜扁舟論素心

何士明判簿以詩求作雲麓書隱圖不果為作

步韻奉答已酉

十年江上憶茅廬故託毫縑寫舊居濟世可堪終稼穡  
蒞民無計禦樵漁久知心遠懷桑梓已喜身閒棄簿書  
雲麓真山應會見莫看圖畫賦歸歟

題送行詩卷

辛亥

端木孝友孝思從先子游尋復侍尊人之官江  
西有送行書卷余未之作今歲又侍親在朝偶  
會於鳳凰臺下求補此卷為賦此

江西未有送行句此日相逢再賦詩定省羨君多伯仲

飄零憐我獨孤遺夢回石水論文夜喜見秦淮問禮時  
後會茫茫又何地應須努力慰相思

題王悅中長司林泉歸隱詩卷

王君歸隱林泉志先子當年亦有詩身老可堪奔走職  
子賢不負聖明時夢回雲海滄波遠春到園林化日遲  
我欲遺書訪泉石白雲已有宿年期


發新城至江浙書懷

癸丑

夜發新城望浙城好風吹送片帆輕一丸皓月天心小



萬里滄江鏡面平  
白浪總催前後事  
青山不盡古今情  
重來十載登臨地  
何處故人同眼明



覆瓿集卷二

欽定四庫全書

集部  
覆瓿集卷  
三四

詳校官太僕寺少卿臣李廷欽

中書臣劉源溥覆勘

總校官原任中允臣王燕緒

校對官中書臣孫球

謄錄監生臣張永浙

欽定四庫全書

覆瓿集卷三

明朱同撰

七言律詩

十月十六夜嚴陵城下翫月

癸丑

誰送水盤上九天清光不減夜來圓雲連遠岫橫天外  
山擁孤城枕水邊重鎮已空前日夢棹歌猶認去年船  
半生未了滄洲願安得垂綸繼昔賢

遂邑阻雨書懷

甲寅二首

一春多事羈遂陽處處水潦如望洋青山雨歇鳥啼急  
白日門關蠶績忙倚門無復念游子思親空自摧衷腸  
慈烏中夜驚獨宿為爾涕泣沾衣裳

其二

凝雲一月翳朝陽四望平無盡海洋蜀魄喚春空自苦  
吳蠶作繭為誰忙一身留滯難回首萬事牽縈易斷腸  
繼述久知心事重莫將流涕浪沾裳

杜休寧秩滿將行以李生畫鷁留別江彥銘令

余為題

李生前朝人自題云某人作以記重逢

文昌自是文章伯令我題君畫鶴詩翹首豈無霄漢志  
潛身猶待羽毛期李生昔記重逢日杜老今當惜別時  
好爵與縻應有意林臯空動故人思

宗家成仲以先子所題墨竹求詩

先子手筆故家竹蟠虬蛟龍墨尚新典則喜存三世物  
文章猶見百年人修莖已傲風霜晚嫩葉還沾雨露春  
欲繼短篇題紙背披圖令我倍思親

嚮明樓 甲寅

庚戌之冬先子為宗家子敏作嚮明樓記道其  
移孝就忠之意因得疾歸不起今年賤子省家  
林子敏邀宿是樓求題斯卷次早倚欄雲山萬  
變曉光中誠為勝槩復念斯文先子之絕筆也  
謹賦近體以寓傷感之懷

嚮明樓上乍登臨對景興懷感慨深萬疊雲山迎曉日  
一庭烟樹接春陰獲麟自念當年筆報主誰知此日心

萍梗東西根本在每飛魂夢到家林

題希陶詩卷

甲寅

宗家子華名菊自號希陶翁有詩卷子華好讀  
易亦好飲自註學易碎錄其志可嘉求題茲卷  
為賦

典午忽兮不可尋靖節感慨何其深赤松終遂博浪擊  
孤竹肯改西山心百年事異有興廢曠代志同無古今  
希陶果解前人意述酒雄篇時一吟



其二

奕世宗家不乏賢  
衣冠猶見壁珠聯  
甘為彭澤歸來後  
欲究庖犧未盡前  
酒熟但邀隣舍飲  
書成應付子孫傳  
思鄉游子情何限  
安得相從濯澗泉

贈別趙省郎乙卯

趙璧連城舉世知  
紫陽一見又分離  
莫辭遠客長征日  
正是男兒報主時  
山路春明花隱隱  
驛庭烟煖柳垂垂  
定知公館多詩興  
好寄雙魚慰所思

同休邑丞應叔原由屯溪泛舟至溪東贈別時

丞委運海船木乙卯

屯溪渡頭春水生  
孫王山下滄波平  
斷雲過雨有底意  
落日青山無限情  
送別已知難作別  
舟程那敢緩王程  
江山勝處須題詠  
安得與君同眼明

游觀崖亭圖

有序

為石文舉長司題游觀崖亭圖是亭杜休寧所  
創余去年嘗同杜公游有詩

落日溪頭曾艤舟  
新亭俯瞰碧波流  
當時對飲偶嘉會  
此日題詩思舊游  
天祿遠涵清鏡曉  
齊雲平接野烟秋  
少陵醉後雄篇在  
幕府還能為爾留

汪谷賓因李雪齋求余寫臨清樓圖併詩

野人未上臨清樓  
作圖題詩神預游  
題詩不盡登臨興  
作圖漫寫凭欄秋  
水南鬟黛入簾小  
松蘿空翠當牕流  
想像賦成終未穩  
安得乘興來上頭

題菊堂有序

戴榮仲以菊名堂因眷家程孟德求題以不知其為人未之作也而孟德催促坐守因賦

菊堂詩債已年餘孟德重催始就書欲寄淵明籬下句未尋安道雪中居清香獨傲秋霜老棟宇猶涵夜月虛甲子千年誰解得為題君卷倍躊躇

江節婦有序

節婦孫氏友人江彥功之母也先子為之傳翰林諸公皆為品題今歲彥功復求僕着語時孫

氏已棄榮養而先子亦捐館矣傷今感昔為賦  
蕭江節婦先君傳苦操雄文照亂離操定不隨天地改  
文傳空使古今悲平原渺渺春暉遠蘭樹依依麗日遲  
把卷欲題當日事嚴親又動九京思

夢別陳彥珍并序

臘月十日夢陳彥珍判簿考滿而歸方樽酒談  
笑間復有長安之除促使已在門矣惻然別去  
夢中作此覺後急書之

握手相逢喜未闌  
又遮西日上長安  
江山千古形空壯  
戈甲十年民已殘  
路遠誰憐行役苦  
情深自覺別離難  
下車早報平安信  
白髮高堂淚未乾

黟山汪孟和以其祖居棲碧樓作圖求賦為題  
之時為府吏

謫仙去我日已遠  
誰復結樓棲碧山  
韶華一逐流水去  
碧桃幾見春風還  
龍魚每懷臯祖重  
騏驥肯放聞孫閒  
題詩不盡歸歎意  
安得與子窮躋攀

題自畫

樓觀橫空倚薜蘿，千尋晴碧落滄波。  
天連極浦歸帆小，雲鎖重巖積翠多。  
一壑已堪藏蠹籍，百年只合老漁蓑。  
扁舟草閣相看者，應有臨風歎乃歌。

題金山寺

庚申

袖拂塵埃到上方，白雲深處自生涼。  
金爐香細輕浮座，貝葉陰濃靜轉廊。  
十二樓臺餘寂寂，三千世界杳茫茫。  
沉傳今古爭梯接，獨有文公重感傷。

題宣上人棲碧軒

謫仙不答俗人問此是西來第一禪  
究竟本無文字教  
品題猶有短長篇  
軒開淨几雲生座  
欄瞰清溪水漲川  
忽憶門前車馬事故知  
宣老即青蓮

青蓮居士謫仙人  
酒肆藏名三十春  
湖州司馬何須問  
金粟如來是後身  
此李謫仙詩也大慧  
語錄云歸宗可宣禪師  
與郭功甫友善  
功甫時任星子尉  
宣寄書云且托生君家  
六年望君見



顧功甫得書驚喜中夜見宣入內妻果有姪及  
生即名宣老纔週歲記問如昔逮三歲白雲端  
和尚過其家纔見便呼師侄端云與和尚相別  
幾年宣屈指云四年端云在甚處宣云白雲座  
上喫油糍忽門外推車過端云門外甚麼聲宣  
作推車勢端云過後如何答曰平地一條溝云

題自畫榆溪清隱圖寄程國輔

庚申

榆花飛處杏花開盡是高手自栽古寺晚鐘僧出定

平林春雨鷺飛迴，傳家幸有藏書屋。  
報主慚無濟世才，何日許辭金殿直。  
杖藜莫訝客頻來。

其二

初月梅花近水開，滿林仙杏為誰栽。  
雨晴採藥穿雲去，風煖尋詩步月迴。  
身近玉墀膺寵渥，手調金鼎詫奇才。  
鳳凰池上頻回首，會見鵷班接踵來。

陞春官侍郎遣篤郎歸寄陳姊夫德銘

乙丑二月

憶昔家居溪上村，青山為郭石為門。  
姻親賴有朱陳舊。

問學誰知道義尊君守園林承祖澤我糜廩祿荷天恩  
疎慵若有歸田日世學還須重討論

其二

自携琴劍別幽居魂夢無時遶故廬訪遠已知親誼重  
趨朝還念非才疎百年霜露遺先壟萬卷牙籤積舊書  
歸到楓林煩護念時傳消息報何如

遭誣得罪賦此以見志

乙丑三月

四十趨朝五十過典章事業歷研磨九重日月瞻依久

一代文章制作多豈有黃金來暮夜祗慚白髮老風波  
歸魂不逐東流水直上長江訴汨羅

其二

自知廉潔可匡君豈料顛連更殞身七載儀刑多制作  
百年經史豈無聞人情洶洶何時定世事茫茫總莫伸  
九死一生何足報盡將心事付蒼旻

五言絕句

契友汉口范平仲寫雲溪歸隱圖成題此

疊嶽青螺擁閒雲白練舒林椽數間屋彷彿似吾廬

題畫馬手卷

八駿去已久驊騮未易逢君看七十四匹若箇是真龍

其二

塞北平如砥沙場五月寒驊騮不受馭馬用置奚官

六言絕句

題琴趣軒卷

構屋已題琴趣寫懷更賴詩腸一操九臯鳴鶴仙風吹

送天香

其二

箕子誰傳悲操汾亭空寄餘音獨有杏壇玄聖乾坤今古同心

其三

澆世漸離淳古九疑望斷重瞳寄語軒中高士為誰彈作南風

其四

淨几爐烟畫靜小齋花氣春酣莫作商聲秋調鶯啼三  
月江南

題浯溪清隱圖贈吳甥

山下半篙春水溪頭幾樹疎烟為問故人閒處聽松應  
是高眠

題五城程均敬畫

雲散山連晴碧江空樹倚高秋天外歸舟何處山中十  
二層樓

七言絕句

小園栽菊

菊苗移向小園中  
好雨初晴土脉通  
不是陶潛耽野趣  
欲留晚節待秋風

其二

老菊叢根寄小盆也  
知春至長兒孫扶持已費栽培力  
長育全資雨露恩

即事



菊自離披蝶自愁道人無事懶悲秋多情昨夜三更雨  
洗出青山著屋頭

其二

結茅深住白雲窩人跡何如鳥跡多村塢月明聞犬吠  
定知山虎夜深過

畫扇

是處青山好結廬杜陵每愛野人居白雲不作蒼生雨  
長向林中伴讀書

題錢舜舉海棠白頭翁

睡起嬌紅映綠紗  
春風籬落一枝斜  
山禽自是頭元白  
莫向花間怨歲華

題宋太祖蹴毬圖

龍未興雲虎未風  
一包元氣聚英雄  
等閒蹴向陳橋驛  
百二山河舉步中

墨菊

三徑秋香不可無  
伊誰描得影模糊  
只愁醉倒陶彭澤

故着當年僧褐夫

畫扇 癸卯

時余與董伯和同寓越與作此圖以寓思歸之意故題之如此

一棹滄浪烟霧深古松陰底自沉吟  
家山只在青山下重疊暮雲何處尋

宿江頭不了寺

分得禪房半榻眠譚空因悟靜中天  
隔牕一夜江頭雨

忽憶春山好種田

訪祥雲谷首座不遇

荷鋤欲訪祥雲谷  
雲出天涯晝寂寥  
凝念過從知姓字  
秋聲何處有芭蕉

遣人歸寄

年餘始報平安信  
萬緒千端下筆難  
但得雙親長健在  
不須流淚倚欄杆

其二

甲辰之冬十月望行客此時應到家想得雙親淹淚眼  
問兒何事在天涯

其三

兩字平安報細君勲名未了百年身但令貞潔如圓月  
不用春閨夢遠人

至赤岸

千里奔馳志未灰小舟又唱楚歌回舉頭遙見塔  
無數青山隔岸來

題畫扇錢葉省郎越中行

三月錢塘春漸濃  
老松長吼海門風  
故人一別知何處  
天外青山是越中

其二

清明時節雨霏霏  
客子新裁白紵衣  
日日江頭問消息  
洗天風雨幾時歸

題畫

溪上青雲好結居  
午陰不用廢葵蒲  
松風吹醒江湖夢

猶道潮聲撼草廬

其二

老樹亭間翠影疎  
遠山烟外淡模糊  
扶筇但問清溪水  
還向長江作浪無

其三

林臯獨立誰家翁  
悵望天際來秋風  
暮烟未收遠山淡  
海潮初落滄江空

其四

老松屈盤倚亭樹靈物那無鬼神護只愁一夜風雨來  
化作神龍擘崖去

除夜有感

甲辰

椒盤明早頌椒花又是新年草歲華却憶去年當此夜  
吳江霜落夢歸家

其二

大地久嗟風土異昊天終見歲時同來朝擬上南山壽  
安得封詞付曉風



雪霽

曉分梅影天花白  
夜引蟾光玉色明  
臥對軒牕迷近遠  
忽聞鼓柁剡舟行

題自寫山水

岸上青山山下雲  
孤舟潮落繫江濱  
却看江上風濤險  
何似林間自在身

花朝登砂子嶺

山上白雲山下溪  
雨餘石磴靜無泥  
幽禽不管興亡事

盡日林間自在啼

睡起偶書

八面櫺牕八面開  
畫屏牕外綠於苔  
竹床藤枕涼如水  
睡熟不知山雨來

泛舟嚴陵己酉

江水環山觸處開  
長歌輕撥浪花回  
舟行轉盡疑無地  
又擁雲山一簇來

其二

雨聲徹曉收不住船頭水高三尺強只許多買山陰酒  
中流擊楫歌滄浪

其三

千灘水沒浪花浮鼓枻乘濤喜順流兩岸青山看不盡  
扁舟五日到嚴州

其四

來時水沒千灘平歸去水落石崢嶸却看岸痕思前日  
舟在垂楊樹巔行

閒閒道士求題息齋竹

楚山修竹不可致誰寫秋風筆底開疑是道人吹紫竹  
月明引得鳳凰來

小景

短籬茅舍是誰家樓隱松篁石徑斜記得繫船溪上日  
暮山重疊鎖烟霞

簫

紫管何年玉刻成宮商隨指自分明夜深喚起洞霄月

十二綵鸞天上鳴

楊妃上馬圖

錦韉銀鞍映綺羅  
開元猶是舊山河  
海棠春暖嬌無力  
寫向生綃恨轉多

白描湘妃圖

苦竹嶺頭啼鷓鴣  
瀟湘江上是蒼梧  
月明猶記當年夢  
仙袂翩翩淡欲無

楓林牧隱圖為吳子

松蘿遠削青芙蓉，笛聲又起秋原風。  
牧客醉歸牛飲澗，黃花滿地霜楓紅。

雲溪歸隱圖 并序

洪武壬戌范平仲以事之京，持圖求補前序為題絕句於圖上，以見意為後會。張本云：

雲溪歸隱終難隱，客館裁詩未是詩。  
待到柴門重掃日，是余文債欲償時。

春江送別圖贈吳伯成省郎使回 乙卯

三月江南烟雨晴  
杜若草沒滄江平  
輕舟短棹又相別  
花落鳥啼難為情

其二

王程豈計路遠近  
山色自與帆相迎  
想得皇華歸使日  
日邊遙拜五雲明

墨菊寄方山程德明

方山處士別我久  
每挹高風晚節香  
賴此鸞谿三尺雪  
寄君日日作重陽

寫墨菊寄陳彥珍

挑燈乘興寫秋芳  
寄與幽人晚節香  
粟里尚遺三徑在  
何時同子醉重陽

題自畫寄陳親

柴門舊日經游駐  
留得風烟在故居  
為問盤中陳處士  
溪山清興近何如

戲問龍筆架

古貌人傳漢祖顏  
全無變化似庸孱  
何如千載風雲志



俛首低回筆硯間

答

頑軀豈望風雲會  
素志長懷鐵石堅  
待到文明開聖治  
負圖也學出河邊

題畫

紫陌紅塵沒馬頭  
人來人去幾時休  
誰家有酒身無事  
長對青山不下樓

錢塘歌

錢塘兒女面如雪  
錢塘兒女脚如鐵  
販鮮海上不歸來  
夜夜吹簫望明月

竹枝詞 十八首

錢塘兒女不學針  
月明樓下理胡琴  
逢人但道新番曲  
不識春愁海樣深

十八嫁郎眉未開  
郎輕離別重求財  
扁舟一逐江潮去  
日日潮來郎未來

郎去從征不見來  
門前小徑已生苔  
願得海門高萬丈

倒流江水送郎回

郎在潮東儂在西臨鷺愁盡遠山眉梅花月冷珊瑚闕

湖上兒女宮樣裝小舟蕩漾菱荷香逢人便唱相思曲  
不道儂家有阿郎

郎去從君二十年花開花落任春妍門前有箇垂楊樹  
不着游人繫畫船

十五十六月正圓樓頭買卜問青天月如照到吳江水

郎在吳江第幾船

儂家住湧金門青見高峯白見雲嶺上已無丞相宅  
湖邊猶有岳王墳

葛嶺東頭是相門當年甲第入青雲樓船東入裏湖去  
何曾望見岳王墳

郎心恰似江上蓬昨日南風今北風妾心恰似七寶塔  
南高峯對北高峯

勸郎莫上南高峯勸郎莫上北高峯南高峯雲北高雨

雲雨相隨愁殺儂

芙蓉月底雙鴛鴦飛來飛去在橫塘  
人生多少不如意  
水遠山長難見郎

阿儂隨郎上釣舟郎作釣絲儂作鈎  
釣絲無鈎隨風颺  
釣鈎無絲隨水沉

湖草青青湖水深  
畫船撐出斷橋陰  
畫船無柁是郎性  
斷橋有柱是儂心

茜紅裙子縷金紗  
多在湖船少在家  
黃衣年少不相識

白日敲門來索茶

阿儂家住第三橋  
白粉墻低翠竹高  
春光一日老一日  
怕見花間飛伯勞

望郎一朝又一朝  
蕭郎信似浙江潮  
錢塘潮信有時失  
臂上守宮無日銷

小姑擬郎去不歸  
為郎打瓦復鑽龜  
青山尚有飛來日  
豈有人無相見時

覆瓿集卷三